

Kantik A Kantik Yo

¹ Kantik A ✧Kantik Yo, ki ekri pa Salomon.

Jenn Fi a

² Kite l bo m ak bo bouch li!
Paske ✧lanmou ou bon pase diven.

³ Lwil pafen ou yo santi bon.
✧Non ou menm se tankou lwil san tach;
se pou sa ke tout jenn fi yo renmen ou konsa.
⁴ Rale m dèyè ou e annou kouri ansanm!
Wa a mennen m nan chanm li.”

Lòt Yo

✧“Nou va rejwi nan ou e fè kè kontan;
nou va leve lanmou ou wo plis pase diven.
Ak bon rezon, yo renmen ou konsa.”

Jenn Fi a

⁵ Mwen menm, mwen nwa; men mwen byen bèl,
O fi a Jérusalem yo, tankou tant ✧Kédar yo,
tankou rido a Salomon yo.

⁶ Pa gade mwen konsa akoz mwen nwa;
solèy la brile m konsa.
✧Fis a manman m yo te byen fache avè m;
Yo te fè m gadyen chan rezen yo.
Men pwòp jaden pa m nan vin neglije.

⁷ Pale mwen, ou menm nan
ke nanm mwen tèlman renmen;
ki kote ou fè patiraj twoupo ou a?

✧ **1:1** I Wa 4:32 ✧ **1:2** Kan 1:4 ✧ **1:3** Ekl 7:1 ✧ **1:4** Kan
1:4 ✧ **1:5** És 60:7 ✧ **1:6** Sòm 69:8

Ki kote ou konn fè l kouche a midi?
 Paske poukisa mwen ta tankou yon moun
 ki vwale figi li nan kote twoupo ☆zanmi ou yo?

Salomon

⁸ Si ou menm, ou pa konnen,
 O ☆pi bèl pami tout fanm yo;
 janbe swiv wout a twoupo a,
 e fè patiraj pou jenn kabrit ou yo
 akote tant bèje ou yo.

⁹ Pou mwen, cheri mwen an,
 ou tankou ☆ pi bèl femèl cheval la
 pami sa ki t ap rale cha Farawon an.

¹⁰ Bò figi ou byen bèl ak zanno,
 kou ou ak ☆bèl kolye.”

Lòt Yo

¹¹ Nou va fè pou ou dekorasyon an lò
 anbeli ak pwent an ajan tou won.”

Jenn Fi a

¹² Pandan wa a te sou tab li,
 ☆pafen mwen te rive kote l ak bèl odè.

¹³ Sila ke m renmen an se yon pòch pafen
 ☆fèy bazilik ki pase tout nwit lan antre tete
 mwen.

¹⁴ Cheri mwen an se yon grap flè
 byen plase nan chan rezen ☆En-Guédi yo.
 Konsa li ye pou mwen.

Salomon

¹⁵ “Tèlman ou bèl, cheri mwen an; tèlman ou bèl!

☆ **1:7** Kan 8:13 ☆ **1:8** Kan 5:9 ☆ **1:9** II Kwo 1:16-17 ☆ **1:10**
 Jen 24:53 ☆ **1:12** Kan 4:14 ☆ **1:13** Sòm 45:8 ☆ **1:14** I Sam
 23:29

✧Zye ou tankou toutrèl.”

Jenn Fi Lan

¹⁶ Gade jan ou bèl e byen agreyab, ✧cheri mwen an;

anverite, se zèb vèt ki fè kabann nou.

Salomon

¹⁷ Pilye kay nou se ✧bwa sèd e travès yo se bwa pen.

2

Jenn Fi An

¹ Mwen se flè Woz Saron an, flè Lis a vale yo.”

Salomon

² Tankou yon flè lis pami pikan yo, se konsa ✧cheri mwen an ye pami tout jenn fi yo.”

Jenn Fi an

³ Tankou yon ✧pye pòm pami bwa nan forè, se konsa cheri mwen an ye pami jennonm yo. Nan lonbraj li mwen te pran gwo plezi pou m te chita;

konsa fwi li te dous nan gou m.

⁴ Li te mennen m nan gwo sal bankè li, e ✧drapo li monte sou mwen an se lanmou.

⁵ Ban m fòs ak ✧ gato rezen, rafrechi m ak pòm,

akoz mwen malad ak lanmou.

⁶ Kite men goch li rete anba tèt mwen

✧ 1:15 Kan 4:1 ✧ 1:16 Kan 2:3-17 ✧ 1:17 I Wa 6:9-10 ✧ 2:2 Kan 1:9 ✧ 2:3 Kan 8:5 ✧ 2:4 Sòm 20:5 ✧ 2:5 II Sam 6:19

ak men dwat li pou l ✨anbrase m.”

⁷ M ap ✨avèti nou, O fi a Jérusalem yo,
nan non antilòp ak bich mawon an,
pou nou pa fè lanmou m leve,
ni ouvri zye li jiskaske se plezi li.

⁸ Koute! Men cheri mwen an!

Men l ap vini,
monte ✨sou mòn yo,
epi vòltije sou kolin yo!

⁹ Cheri mwen an tankou yon ✨antilòp,
oswa yon jenn sèf.

Gade byen, li kanpe dèyè mi kay nou an;
l ap gade nan fenèt yo, l ap gade nan jalouzi a.

¹⁰ Cheri mwen an te reponn mwen
e te di m: ✨“Leve vini cheri mwen an,
pi bèl mwen an.

¹¹ Paske gade, sezon fredyè a fin pase,
lapli fin pati nèt.

¹² Flè yo deja parèt nan peyi a;
tan an fin rive pou taye branch yo;
vwa a ✨toutrèl la ap koute deja nan peyi a.

¹³ Fwi ✨pye fig etranje a fin mi
e chan rezen yo bay odè pafen.
Leve vini, pi bèl mwen an!

Salomon

¹⁴ O toutrèl nan ✨fant wòch mwen an,
nan kote sekre chemen ki monte apik,
kite mwen wè fòm ou, kite mwen tande vwa ou!

✨ 2:6 Pwov 4:8 ✨ 2:7 Kan 3:5 ✨ 2:8 Kan 2:17 ✨ 2:9 Pwov
6:5 ✨ 2:10 Kan 2:13 ✨ 2:12 Jen 15:9 ✨ 2:13 Mat 24:32
✨ 2:14 Jr 48:28

Paske vwa ou dous e fòm ou bèl nèt.”

¹⁵ ✧ Kenbe rena yo pou nou,
ti rena k ap detwi chan rezen yo
pandan chan nou yo ap fè flè.”

Jenn Fi an

¹⁶ Cheri mwen an se pa m,
e mwen se pa l;
li fè patiraj twoupo li pami flè lis yo.

¹⁷ ✧ Jiskaske jounè a vin fè fre
e lonbraj yo kouri ale; vire, cheri mwen an
e fè tankou antilòp la, oswa jenn sèf
sou mòn Bether a.

3

Jenn Fi an

¹ Sou kabann mwen, nwit apre nwit,
mwen te chache sila ✧ ke nanm mwen renmen
an;

mwen te chache l, men m pa t jwenn li.

² ‘Koulye a fòk mwen leve mache toupatou nan
vil la;

nan ✧ ri yo ak nan plas yo.

Fòk mwen chache sila ke nanm mwen renmen
an.’

Mwen te chache l, men m pa t jwenn li.

³ ✧ Gadyen ki fè tou vil la te twouve m;

mwen te mande l: ‘Èske ou konn wè
sila ke nanm mwen renmen an?’

⁴ Lè m ✧ fenk kite yo mwen te jwenn

sila ke nanm mwen renmen an;

mwen te kenbe l, mwen te refize lage l

jiskaske mwen mennen l rive lakay manman m,

✧ **2:15** Éz 13:4 ✧ **2:17** Kan 4:6 ✧ **3:1** Kan 1:7 ✧ **3:2** Jr 5:1

✧ **3:3** Kan 5:7 ✧ **3:4** Pwov 8:17

pou l antre nan chanm a sila ki te vin ansent mwen an.”

⁵ M ap ☆avèti nou, O fi a Jérusalem yo, nan non antilòp ak bich mawon an, pou nou pa fè lanmou m leve ni ouvri zye l jiskaske se plezi li.

⁶ Se kisa k ap monte kite dezè a tankou pilye lafimen yo, byen pafime ak fèy bazilik ak ☆lansan, plen ak poud santi bon machann yo?

⁷ Gade byen, se kanape vwayaj Salomon k ap monte; swasant òm pwisan kap antoure l, mesye pwisan Israèl yo.

⁸ Yo tout ki konn manyen nepe, ☆ki fò nan afè lagè; chak mesye gen nepe l bò kote li, pou fè gad kont menas lannwit yo.

⁹ Wa Salomon te fè pou kont li yon kanape vwayaj ak bwa Liban an.

¹⁰ Li te fè pye li ak ajan e repo pou do a ak lò. Kote pou chita a fabrike ak twal mov e tout anndan li byen dekore pa ☆fi Jérusalem yo.

¹¹ Ale, O fi a Sion yo, e fikse byen Wa Salomon ak kouwòn sila a manman l te kouwone l nan ☆jou fèt maryaj li, a ak jou kè kontan li an.”

☆ **3:5** Kan 2:7 ☆ **3:6** Egz 30:34 ☆ **3:8** Jr 50:9 ☆ **3:10** Kan 1:5 ☆ **3:11** És 62:5

4

Salomon

¹ A la ou bèl, cheri mwen an, a la ou bèl!

✧Zye ou tankou toutrèl dèyè vwal ou;
cheve ou tankou yon bann kabrit
ki fin desann sòti Mòn Galaad.

² ✧Dan ou tankou yon bann mouton
ak lenn fenk taye ki sot benyen,
yo tout fè pòtre jimo yo
san ke youn nan yo pa pèdi pitit li.

³ Lèw ou tankou yon ✧fisèl wouj
e bouch ou tèlman bèl.
De bò figi ou tankou yon tranch grenad dèyè
vwal ou.

⁴ ✧Kou ou tankou fò David la,
bati ak wòch byen ranje sou sila yo mete mil
boukliye yo,
tout boukliye won a mesye pwisan yo.

⁵ ✧De tete ou tankou de jèn ti antilòp;
jimo manman k ap chache manje pami flè lis yo.

⁶ ✧Jiskaske jou a bese pou l vin fre
e lonbraj yo vin disparèt,
mwen va trase chemen mwen rive nan mòn
fèy bazilik la, ak nan kolin lansan an.

⁷ ✧Ou fin bèl nèt, cheri mwen an,
e nanpwen defo nan ou.

⁸ Vin avè m soti ✧Liban, fi maryaj mwen an;
m bezwen ou vini avè m sòti Liban.
Vwayaje desann soti nan wo pwent Amana,

✧ **4:1** Kan 1:15 ✧ **4:2** Kan 6:6 ✧ **4:3** Jos 2:18 ✧ **4:4** Kan
7:4 ✧ **4:5** Kan 7:3 ✧ **4:6** Kan 2:17 ✧ **4:7** Kan 1:15 ✧ **4:8**
I Wa 4:33

soti nan wo pwent Mòn Senir ak Hermon;
soti nan kav lyon yo, nan mòn a leyopa yo.

⁹ Ou fè kè m bat pi vit sè mwen, fi a maryaj mwen
an;
ou te fè kè m bat pi vit ak yon sèl ti kout zye tou
kout,
ak yon sèl bout fisèl nan ✧kolye ou.

¹⁰ ✧A la bèl lanmou ou bèl, sè mwen an,
fi a maryaj mwen an!

A la pi bon lanmou ou pi bon pase diven
e bon odè a lwil ou depase tout kalite epis!

¹¹ Lè ou, fi a maryaj mwen an,
gen gou siwo myèl; siwo myèl ak lèt anba lang
ou
ak bon odè vètman ou tankou ✧bon odè Liban
an.

¹² Yon jaden fèmen ak kle se sè mwen,
fi a maryaj mwen;
yon jaden wòch ki fèmen,
yon fontèn dlo ki ✧ansèkle.

¹³ Boujon ou se yon chan kiltive ak pye grenad,
ak fwi chwazi, pye jasmen ak ti bonm;

¹⁴ ti bonm ak safran, sitwonèl ak kannèl,
ak tout bwa lansan yo, ✧lami ak lalwa,
ansanm ak tout meyè kalite epis yo.

¹⁵ Ou menm se yon sous jaden,
yon pwi ✧dlo fre ak ti ravin dlo k ap kouri soti
Liban.

Jenn Fi an

¹⁶ Leve, o van nan nò a, e vini van nan sid;

✧ **4:9** Jen 41:42 ✧ **4:10** Kan 7:6 ✧ **4:11** Jen 27:27 ✧ **4:12**
Jen 29:3 ✧ **4:14** Sòm 45:8 ✧ **4:15** Za 14:8

fè jaden mwen respire ak souf bon odè;
 kite epis li yo vante gaye toupatou. Ke cheri
 mwen an vin nan jaden li an
 pou manje tout fwi chwazi li yo.

5

Salomon

¹ Mwen te vini nan jaden mwen an, sè mwen,
 fi a maryaj mwen an;
 mwen te ranmase lami mwen ak tout fèy awom-
 atik mwen.
 Mwen te manje gato myèl ak siwo myèl mwen;
 mwen te bwè diven mwen ak lèt mwen.

*Lòt Yo Manje, zanmi nou yo; bwè e vin sou ak
 lanmou!*

Jenn Fi a

² Mwen t ap dòmi, men kè m t ap veye.
 Yon vwa! Cheri mwen an t ap frape sou pòt la:
 “Ouvri pou mwen, sè mwen, cheri mwen an,
 toutrèl mwen an, ou menm ki pafè pou mwen
 an! Tèt mwen mouye ak lawouze,
 ✧très cheve mwen ak imidite nwit lan.
³ Mwen te ✧fin retire rad mwen;
 kijan pou m ta remete l ankò a?
 Mwen te lave pye mwen;
 kijan pou m ta fè vin sal yo ankò a?
⁴ Cheri mwen an te lonje men l pase nan twou
 pòt la
 e tout ✧santiman mwen te leve pou li.
⁵ Mwen te leve pou ouvri pou cheri mwen an;

✧ 5:2 Kan 5:11 ✧ 5:3 Luc 11:7 ✧ 5:4 Jr 31:20

epi men m te ☆degoute menm ak lami
e dwèt mwen ak dlo lami, sou manch boulon pòt
lan.

⁶ Mwen te ouvri a cheri mwen an,
men cheri mwen an te ☆vire kite pou l ale!
Kè m te sòti lè l t ap prale a.

Mwen te chache li, men mwen pa t jwenn li;
mwen te rele li, men li pa t reponn mwen.

⁷ ☆Gadyen ki te fè tou vil la te twouve mwen;
yo te frape mwen e yo te blese mwen.
Jandàm sou miray la te retire gwo manto sou
mwen an.

⁸ “M ap ☆avèti nou, O fi a Jérusalem yo,
si nou jwenn cheri mwen an, konsa nou va di l;
ke mwen malad ak lanmou.”

Lòt Yo

⁹ “Ki kalite cheri ki cheri ou a,
sinon pi bèl pami fanm yo?
Ki kalite cheri ki cheri ou a,
ke ou ta avèti nou konsa?”

Jenn Fi a

¹⁰ Cheri mwen an mèvèye,
yon figi wouj ranpli ak sante,
k ap ☆parèt miyò pami di-mil.

¹¹ Tèt li tankou lò, lò san tach;
☆très cheve li tankou grap rezen
e nwa tankou kòbo.

¹² Zye li tankou toutrèl
kote dlo k ap koule benyen nan lèt,

☆ 5:5 Kan 5:13 ☆ 5:6 Kan 6:1 ☆ 5:7 Kan 3:3 ☆ 5:8 Kan
2:5 ☆ 5:10 Sòm 45:2 ☆ 5:11 Kan 5:2

ki chita akote yon ✨basen dlo.

¹³ De bò figi li tankou yon kabann fèt ak fèy awomatik,

kouch fèt ak zèb santi bon;

lèv li se flè ✨lis ki degoute dlo lami.

¹⁴ Bra li se baton fèt an lò, anbeli ak bijou beril; vant li se ivwa taye ki kouvri ak pyè safi.

¹⁵ Janm li se pilye fèt an mèb blan e plase sou yon baz lò san tach; aparans li tankou ✨chwa Liban kon bwa sèd.

¹⁶ Bouch li plen ak dousè e li totalman dezirab. Sa se cheri mwen an e sa se zanmi mwen an, o fi Jérusalem yo.

6

Lòt yo

¹ ✨“Kote cheri ou a te ale, o pi bèl pami fanm yo? Kote cheri ou a te vire, pou nou ka cache li ansanm avèk ou?”

Jenn Fi a

² Cheri mwen an te desann nan jaden li an, nan kabann ki fèt ak fèy awomatik, pou fè patiraj twoupo li nan jaden yo e ranmase flè ✨lis.

³ Mwen pou cheri mwen an e cheri mwen pou mwen; sila ki fè patiraj twoupo li pami flè lis yo.”

Salomon

⁴ Ou bèl, cheri mwen an, tankou ✨Thirtsa; bèl tankou Jérusalem,

✨ **5:12** Egz 25:7 ✨ **5:13** Kan 2:1 ✨ **5:15** Kan 7:4 ✨ **6:1**
Kan 5:6 ✨ **6:2** Kan 2:1 ✨ **6:4** I Wa 14:17

mèvèye tankou yon lame ak drapo.

⁵ Vire zye ou; pa gade m,
paske zye ou fè m egare.

✧Cheve ou tankou yon bann kabrit k ap
soti desann Galaad.

⁶ ✧Dan ou tankou yon bann mouton
ki fenk monte sot benyen,
yo tout ki pòtre marasa,
e nanpwen menm youn nan yo ki pèdi pitit.

⁷ ✧De bò figi ou tankou yon tranch grenad
dèyè vwal ou.

⁸ Genyen swasant rèn ak katre-ven konkibin,
ak ✧jèn fi menm pa kab konte;

⁹ Men toutrèl mwen an, parèy san parèy mwen
an inik:
li se sèl fi a manman li; fi san tach a sila ki te
pote li a.

✧Jenn fi yo te wè l e te rele l beni,
ni rèn ni konkibin yo, e yo te louwe l pou di:

¹⁰ ‘Kilès sa ki grandi kon solèy leve a,
bèl tankou plèn lin nan,
san tach tankou ✧solèy la,
e mèvèye tankou yon lame ak tout drapo li a?’

¹¹ Mwen te desann nan chan bwa nwa yo
pou wè flè yo nan vale a,
pou wè si chan rezen fin fè boujon,
oswa ✧grenad yo te fleri.

✧ **6:5** Kan 4:1 ✧ **6:6** Kan 4:2 ✧ **6:7** Kan 4:3 ✧ **6:8** Kan 1:3

✧ **6:9** Jen 30:13 ✧ **6:10** Mat 17:2 ✧ **6:11** Kan 4:13

12 Avan mwen te menm konnen,
dezi m te plase mwen sou cha a pèp nòb mwen
an.

Lòt Yo

13 Retounen, retounen, O Silamit lan;
✧retounen, retounen, pou zye nou ka gade ou!

Salomon

Poukisa ou ta gade Silamit lan tankou se nan
dans a de twoup koral?

7

1 A la bèl pye ou bèl nan sandal yo, o pitit a
nòb yo!

O ✧fi a prens lan!

Koub kwis ou tankou bijou, zèv a yon vrè atis.

2 Lonbrit ou kon yon tas won ki pa janm manke
diven mele;

vant ou se yon bèl pakèt ble ankadre ak flè lis;

3 ✧De tete ou se de jenn pòtre a yon antilòp,
jimo a yon antilòp.

4 Kou ou se yon kou ivwa,

zye ou tankou sous dlo nan ✧Hesbon yo

akote pòtay a Bath-Rabbim nan;

nen ou tankou tou Liban ki gade vè Damas la.

5 Tèt ou kouwone ou tankou ✧Mòn Carmel

e trè cheve tèt ou tankou fisèl mov;

wa a kaptire pa trè ou yo.

6 A la ou ✧bèl e a la ou mèvèye,

ak tout bèlte ou yo!

✧ 6:13 Jij 21:21 ✧ 7:1 Sòm 45:13 ✧ 7:3 Kan 4:5 ✧ 7:4
Nonb 21:26 ✧ 7:5 És 35:2 ✧ 7:6 Kan 1:15-16

⁷ Lè ou kanpe se tankou yon pye palmis
e tete ou se grap li yo.

⁸ Mwen te di: “Mwen va monte pye palmis lan,
mwen va kenbe tij fwi li yo.’

O ke tete ou yo kapab tankou grap
ki pann sou chan rezen nan
e bon odè a ☆souf ou tankou pòm,

⁹ Epi ☆bouch ou tankou meyè diven an! ki desann
byen swa pou cheri mwen an,
e koule dousman nan lè a sila
ki tonbe nan dòmi yo.

Jenn Fi a

¹⁰ Mwen pou cheri mwen an
e ☆dezi li se pou mwen.

¹¹ Vini! cheri mwen an;
annou pati ale nan chan yo
e fè lojman nan ti vil yo.

¹² Annou leve bonè pou rive nan chan rezen yo;
annou ☆gade pou wè si chan rezen an
gen tan boujonnen e flè li yo fin ouvri.
Se la, m ap bay ou lanmou mwen an.

¹³ Mandragò yo fin bay bèl odè;
epi sou tout pòt nou yo se tout meyè fwi yo,
ni nèf ni ansyen,
ki te konsève pou ou, lanmou mwen an.

8

¹ O ke ou te tankou yon frè m
ki te souse nan tete a manman m.
Si mwen te jwenn ou deyò, mwen ta bo ou;

☆ **7:8** Kan 2:5 ☆ **7:9** Kan 5:16 ☆ **7:10** Sòm 45:11 ☆ **7:12**
Kan 6:11

nonplis, pèsòn pa ta denonse m pou sa!
² Mwen ta mennen ou e ✧fè ou antre lakay a manman m ki te konn enstwi mwen an; mwen ta bay ou diven pafime ki sòti nan ji grenad mwen yo pou ou bwè.
³ Kite ✧men goch li rete anba tèt mwen e men dwat li anbrase m.”

⁴ “✧Mwen vle nou sèmante, o fi Jérusalem yo, pa fè lanmou mwen vin leve, ni ankouraje l jiskaske se plezi li.

Lòt Yo

⁵ Se ✧ki fi sa a k ap monte sòti nan dezè a, k ap apiye sou cheri li a?”

Jenn Fi an

Anba pye pòm nan, mwen te fè ou leve; se la manman ou te gen doulè e te fè ou vin parèt.

⁶ Mete mwen tankou yon so sou kè ou, tankou yon ✧so sou bra ou. Paske lanmou gen fòs menm jan ak lanmò; jalouzi sevè tankou Sejou mò yo; lè l pete se tankou dife k ap pete. Vrèman se flanm SENYÈ a.
⁷ Anpil dlo p ap ka etenn lanmou, ni rivyè p ap ka inonde l.
 ✧Menm si yon nonm ta bay tout richès lakay li pou lanmou, sa ta konplètman meprize.

✧ **8:2** Kan 3:4 ✧ **8:3** Kan 2:6 ✧ **8:4** Kan 2:7 ✧ **8:5** Kan 3:6
 ✧ **8:6** És 49:16 ✧ **8:7** Pwov 6:35

Frè Yo

⁸ Nou gen yon ti sè e li ☆pa gen tete menm;
kisa n ap fè pou sè nou an nan jou ke yon moun
ta vin pale pou l ta fyanse avè l?

⁹ Si li se yon mi, nou va bati yon ranpa fèt an
ajan pou antoure l;
men, si li se yon pòt, n ap fè yon barikad
ak ☆gwo planch bwa sèd.

Jenn Fi a

¹⁰ Mwen te yon miray e ☆tete mwen te tankou fò;
konsa, mwen te devni nan zye li kon yon moun
ki jwenn lapè.

¹¹ Salomon te gen yon chan rezen nan Baal-
Hamon;
Li te ☆bay jerans chan rezen an a gadyen yo.
Yo chak te gen pou pote mil sik ajan pou fwi li
yo.

¹² Pwòp chan rezen mwen an se pou m fè sa m
pito;
mil sik ajan yo se pou ou, Salomon
ak de-san pou sila ki okipe fwi li yo.”

Salomon

¹³ O! ou menm, ki chita nan jaden yo,
zanmi mwen yo ap koute vwa ou;
kite m tandè l.

Jenn Fi an

¹⁴ Fè vit, cheri mwen an;
fè tankou yon antilòp,
oswa yon jenn sèf sou mòn ki plen epis yo.

☆ **8:8** Éz 16:7 ☆ **8:9** I Wa 6:15 ☆ **8:10** Éz 16:7 ☆ **8:11** Mat
21:33

Bib Sen An **The Holy Bible in Haitian Creole, 2022 update**

copyright © 2017-2022 Ron Smith

Language: Kreyòl Ayisyen (Haitian)

Translation by: Ron Smith

Contributor: Felix Nixon

Sa a se yon tradiksyon bouyon. Tanpri voye kòmantè bay tradiktè yo atravè fòm kontak nan <https://www.bibsenan.com/>. This is a draft translation. Please send comments to the translators via the contact form at <https://www.bibsenan.com/>.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-11-11

PDF generated using Haiola and XeLaTeX on 11 Nov 2022 from source files dated 11 Nov 2022

10d5899e-31c7-5009-983b-ffc4788d2e5b